

Mid-Day Dogri News Bulletin 19- Jan.- 2026

समां - 12:25 hrs.

<><><><><><>

LG-Youth

लैफ्टिनेंट गवर्नर मनोज सिन्हा होंरें नौजवानें गी आखेया ऐ जे ओह बड्डे सुक्खने दिक्खन- बड्डे लक्ष्य तय करन ते उनेंगी हासल करने लेई पूरी हिम्मत ते पक्के धेइये दे कन्ने अगगे बधन। एल.जी होंरें युवाएं गी आखेया ऐ जे इक शानदार भविक्ख उंदे लेई बलगा करदा ऐ ते उनेंगी लोइचदा ऐ जे ओह पूरी निश्ठा कन्ने कम्म करदे होई इक खुशहाल जम्मू-कश्मीर दे निर्माण लेई धेइया करन-कीजे इतिहास छड़ा उनेंगी गै चेता रक्खदा ऐ- जेहड़े अपनी हदें गी चुनौती दिंदे होई डर उप्पर जित हासल करदे न ते नामुमकिन गी हकीकत च तब्दली करदे न। एल.जी होंरें साम्बा च गुड़ा सलाथिया आले युवा विकास- मार्गदर्शन ते कैरियर परामर्श सीगे दे 7में सलाना ध्याड़े आले समारोह गी सम्बोधित करा रदे हे। एल.जी होंरें नौजवानें दा आहवान कीता जे ओह समाजी बदलाव दे वास्तुकारें दे तौर पर कम्म करन ते विकसित भारत दे नजिरये गी सच बनाने लेई योगदान देन।

<><><><><><>

LG –Delegation

लैफ्टिनेंट गवर्नर मनोज सिन्हा हुंदे कन्ने मिलने गी आए भाजपा दे सीनियर लीडर तारिक हुसैन कीन हुन्दी अगुआई च लोकें दा इक डैलीगेशन एल.जी हुंदे कन्ने मिलेया। भारती

जनता पार्टी दे शोपियां दे साबका जिला अध्यक्ष मोहम्मद यूसफ भट्ट हुंदी अगुआई च इक डैलिंगेश लैफ्टिनेंट गवर्नर हुंदे नै मिलेया। साबका मंत्री ते जम्मू-कश्मीर बी.जे.पी उपाध्यक्ष बी एल.जी. हुंदे कन्नै मिले ते लोकें दियें समस्याएं गी दस्सेया-दसाया। इस्सै चाल्ली बुंजवा-किश्तवाड़ थमां जिला विकास परिषद दियां मिम्बर आमना चौधरी बी लैफ्टिनेंट गवर्नर हुंदे कन्नै मिलियां ते केई मसलें उन्दे कन्नै साफ कीते।



Kishtwar -Encounter

किश्तवाड़ जिले दियें उप्परलियें धारें पर छप्पे दे आतंकवादियें दी धर फगड़ लेई सुरक्षाबलें तपाशी अभियान परतियै रम्भेया ऐ। एह तपाशी अभियान राती भर बंद रेया। आकाशवाणी जम्मू संवाददाता दी रिपोर्ट मुजब सुरक्षाबलें छात्रु आहले मंद्राल-सिंहपोरा दे सोन्नार ग्रां च तपाशी अभियान शुरु कीता- जेड़ा टाकरे च तब्दील होई गया हा। इस टाकरे च 8 सैनिक घायल होए हे। जख्मी होए दे जोआनें गी इलाके चा कड्डियै अस्पताल पुजाई दिता गेदा ऐ। इंदे चा मते सारे जवान- ग्रेनेड धमाके च छरें लग्गने करी जख्मी होए दे ना। आतंकवादियें दा पता लाने ते उन्दे सफाये लेई बड्डे स्तर पर तुपाई अभियान चलाया गेदा ऐ। जम्मू च स्थित फौज दी वाईट नाईट कोर आसेया कल दपैहरी रम्भे गेदे इक अभियान गी Operation Trashi-I नांs दिता गेदा ऐ। सोशल मीडिया मंच-एक्स पर इक पोस्ट च वाईट नाईट कोर नै दस्सेया ऐ जे तुपाई अभियान दे दरान छातरु दे सोन्नार इलाके च सुरक्षाबलें दा आतंकवादियें कन्नै टाक्करा होआ। इस अभियान गी तौले अंजाम धोड़ी पुजाने लेई

सुरक्षाबलें- निगरानी आले आधुनिक उपकरणों सनें ड्रोन ते खोजी कुते गी बी कम्मै पर लाए दा ऐ।



Rajouri- Alert Situation

राजौरी जिले दे नौशैहरा इलाके दे कलाल सैक्टर च थोड़े समे लेई इक अलर्ट आहली स्थिति उसलै पैदा होई गई- जिसलै ग्रामीण रक्षा गुप VDC दे इक मैम्बर नै इलाके च संदिग्ध नकलो-हरकत गी दिक्खदे होई एहतियात दे तौर पर इक राउंड गोली चलाई। सुरक्षाबलें फौरन इक थाहर पुज्जी गे ते तपाश मुहीम शुरु करी ओड़ी। मगरा लग्गदे इलाके दी घेराबंदी करियै तपाशी अभियान शुरु कीता गया- तां जे कुसै बी चुनौती दे खदशे गी खारिज कीता जाई सकै।



Satish –Srijan

युवा सेवाएं ते खेड्डें सरबन्धी मंत्री सतीश शर्मा होरें आखेया ऐ जे जम्मू-कश्मीर दे नौजवानें दियां शानदार उपलब्धियां इस गल्लै दा सबूत न जे इक -बरोबर मौकें- आधुनिक ढांचे ते सरकार दे मज़बूत समर्थन दे राहें नौजवान मता किश हासल करी सकदे न। “सृजन” नां दे खेड्ड सम्मेलन आली पैहलकदमी दे दरान किट्ठ अगगै भाषण दिंदे होई मंत्री होरें आखेया जे युवा खडारियें दी कामयाबी साफ तौरा पर एह दर्शादी ऐ जे स्हेई बवस्था लागू होने दे चलदे साढ़े प्रदेश दे नौजवान हर चुनौती शा पार पाने ते राश्ट्री ते अंतराश्ट्रीय सतह

दे मंचें पर पूरे विश्वास कन्नै अपनी काबलियत दस्सने च सक्षम न। “सृजन” कार्यक्रम दे उद्देश्यें पर लौऽ पांदे होई सतीश शर्मा होरें आखेया जे एह पैहलकदमी प्रदेश दे खेड्ड तंत्र गी तगड़ा बनाने च बड़े बड़डे बदलाव आली भूमिका निभा करदी ऐ।



Satish -Cricket

युवा सेवाएं ते खड्डें सरबंधी मंत्री सतीश शर्मा होरें उधमपुर च देविका चैम्पियन्स लीग दे फाईनल मैच आले कार्यक्रम च कल हिस्सा लैता। एह प्रतियोगिता खिते च युवा प्रतिभागियें गी नखारने ते मुकाबलेबाजी आली खेड्डें गी बढ़ावा देने आली इक बड़डी पैहलकदमी ऐ। कल खेड्डे गेदे फाईनल मुकाबले गी दिक्खने आस्तै बड़ी बद्ध गिनतरी च लोक उत्थे पुज्जे दे हे। इस मौके पर किट्ठ अग्गे भाषण दिंदे होई मंत्री होरें केन्द्र शासत प्रदेश च इक मजबूत ते टिकाऊ खेड्ड संस्कृति दे निर्माण लेई जम्मू-कश्मीर सरकार दी वचनबद्धता गी फही पक्का कीता। उनें जोर देइयै आखेया जे युवाएं गी अनुशासन- आत्म-विश्वासी ते सेहतमंद बनाने च खेड्डें दी भूमिका बड़ी महत्वपूर्ण ऐ।



Winter Carnival

विंटर कार्निवल -2026 दे दुए ते अखीरले ध्याड़े- कल भद्रवाह दे नमें बस अड्डे च पूरे जोश ते जज्बे कन्नै भव्य समारोह लोआया गया। इस मौके पर स्थानीय बसनीक ते सैलानी बरोबरी दी तदाद च मजूद हे- इस बड़डे समारोह दा आयोजन जम्मू-कश्मीर

सरकार दे सैलसफा विभाग आसेया जिला प्रशासन डोडा ते भद्रवाह विकास प्राधिकर कन्नै रलियै कीता गेदा हा। इस दौरान मन्ने-परमन्ने दे कलाकारें अपनियां प्रस्तुतियां दितियां। स्थानीय सांस्कृतिक प्रोग्राम होए- पारम्परिक खाने ते स्टॉल लाए गेदे हे ते इक Street बाजार दा सरिस्ता कीता गेदा हा तां जे सैलानियें गी पूरा-पराता पारम्परिक ते सैलानी तुजुर्बा हासल करोआया जाई सकै।

प्रोग्राम दा मुख आकर्षण मन्ने दे पंजाबी पॉप सिंगर जी. खान हुंदी पेशकश रेही- जिनें अपनी ऊर्जावान प्रस्तुती ते संगीत दिएं मधुर सुर-लैहरियें कन्नै समां बन्नी ओड़ेया।

